

有部毘柰耶

牙二十

三百十七  
去十

49925



根本說一切有部毗奈耶卷第二十 去

唐三藏法師 義淨奉 制譯

過量乞衣學處第七

尔時薄伽梵在室羅伐城逝多林給孤獨園  
時鄔波難陀作如是念我等所有經求之處  
皆由給孤獨長者啓請世尊制其學處我等  
假欲乞求狹小布巾尚無由得况寬大耶然  
佛世尊或因少欲苾芻乏衣服故有別開聽  
我今宜應覓少欲者共相憑附或緣彼故少  
有所獲即便隨處求覓其人雖復周旋而未  
能見有人報云阿蘭若中有四十衆苾芻少  
欲而住即往詣彼寂靜林中見四十衆苾芻

縫補破衣極生勞苦時鄔波難陀報諸苾芻  
曰具壽我所聞事與見不同比謂仁等四十  
衆苾芻在阿蘭若中受諸靜慮解脫勝樂寧  
知在此惟補破衣艱辛亂意諸苾芻曰大德  
我被賊劫鄔波難陀曰此不善事極受辛苦  
諸苾芻曰大德何故見憂鄔波難陀曰我不  
憂仁愍彼盜者為貪心故枉行劫奪搶身之  
後當墮地獄設得為人受貧窮報諸具壽如  
世尊說汝等苾芻若人由行偷盜數習力故  
命歿之後當生地獄受諸苦惱設得為人衣  
食闕乏緣此事故我出憂言然諸具壽徒勞  
艱苦縫此破衣新好氎布何不見乞諸人報

曰誰捨三寶勝妙福田於我貧人輒肯相施  
報言具壽世尊每於處處讚歎仁等少欲知  
足有信心者皆樂供養何不求乞荅曰我欲  
何處求乞衣耶鄔波難陀曰若無乞處何不  
請覓勸化之人彼能為汝易得衣服荅曰何  
處得有衆所共識大德苾芻捨自善品為我  
求覓鄔波難陀曰我等六衆苾芻各有九弟  
子成六十人共為汝等求覓衣物汝若無違  
隨我意者我等門人因此亦得多少衣服荅  
曰共得衣服於我何違鄔波難陀曰我等豈  
能自行乞食復覓衣耶若不辛苦得飽食者  
可為覓衣諸人報曰此亦善哉時鄔波難陀

還至寺已洒足而進既至房中思惟作何方  
便於此城中搃能勸化惟除給孤長者不入  
其舍彼若見我常懷忿怒我今宜可先往貧  
家次行富舍後往勝光王宅及行兩夫人并  
勝鬘夫人仙授長者故舊居士毗舍佉母善  
生夫婦如是次第從彼乞求時有長者請佛  
及僧家中設食鄔波難陀見已生念告諸弟  
子曰具壽明日汝等設有寺衆差使作務皆  
不須受報言我之二師少有駟使既至明日  
令一弟子往喚四十衆苾芻仁等可來我爲  
求衣使者到彼見諸苾芻悉皆入定使者便  
念誰能於此作麁獷心不觀後世觸誤定者

令其驚覺即便還至鄔波難陀所報言阿遮  
利耶彼皆入定誰能驚覺時鄔波難陀怒而  
告曰癡人無智汝今作此至誠豈即盡諸煩  
惱遂便自往至靜慮堂以脚踏門堂皆振動  
彼從定起問言大德何意如此報言汝四十  
人欲求衣服何故省事於此坐耶來可共去  
彼便報曰且少時任待嚼齒木鄔波難陀曰  
可來半路當嚼四十苾芻即隨而去鄔波難  
陀便與門人共為議曰諸具壽我等六衆猶  
如白象所至之處人皆覓集我等不應老少  
依次群衆而去應可間雜前後別行即隨議  
前進旣行半路嚼齒木已入室羅伐市中貧

人行內叢聚而立鋪主問曰聖者今日有憂  
惱事耶報云我有憂事汝等頗聞有四十衆  
苾芻佛於處處讚歎稱揚少欲知足不報言  
我聞鄔波難陁曰此即其人悉皆被賊劫奪  
衣服鋪人聞已各相告語諸君悉可持諸弓  
刀牌稍之類共執群賊六衆告曰被劫已久  
賊散他方諸人告曰我欲何作六衆報曰可  
施與衣時彼諸人即便收斂新故氎衣持以  
相施是時六衆束成大擔令諸少年荷將歸  
寺次至富人行中共聚而立彼同前問此如  
前荅諸人各各將貴價衣持以相施彼復還  
令送歸寺內次往勝光王所攢集而住時王



見問答事同前王便命彼毗盧宅迦曰汝今  
宜應摠請將師可即急去擒彼賊軍六衆白  
言遭劫已久賊散他邦王曰若尔聖者欲何  
所作六衆報曰可施與衣時勝光王即便人  
別各與十三資具勝妙衣服是時六衆即令  
弟子同前擔去是時四十衆苾芻告鄔波難  
陀曰大德計所得衣我等周足勿復更乞鄔  
波難陀報曰具壽汝等皆是懶惰之人豈不  
共我先有誠言若於仁等無有違者我亦因  
斯為諸弟子覓少衣服何故自足更不肯求  
時諸苾芻聞皆默然尔時六衆苾芻遂便將  
至行雨夫人勝鬘夫人仙授故舊毗舍佉母

善生夫妻處各各問答具如上述時彼皆與  
十三資具上妙衣服所得衣處皆令弟子擔  
向寺中是時六衆報諸人曰世尊昨日與諸  
苾芻受他請食若於食處少百人者行便空  
缺爲施主所恠汝等當去滿彼食行亦當爲  
我送其鉢食時彼六衆遣諸人已自往寺中

選取上衣置之一處其故破者爲四十分時  
四十人赴請食已還來寺中六衆食了告弟  
子曰汝可喚四十少欲人來彼皆來至鄔波  
難陀曰具壽我是汝等守衣人耶宜各取衣  
彼見破衣共相瞻視六衆告曰汝等何故兩  
兩相看彼便報曰何因皆與破碎衣物鄔波

難陀曰此用重疊作僧伽胝此縫作盟多羅  
僧伽及安盟婆娑僧脚崎等足得充濟何所  
嫌耶若意不滿相隨更乞荅曰且得充足更  
勿求餘便各將此破碎之衣往蘭若中隨事  
縫補於其城邑衆皆普聞四十衆苾芻王及  
諸人七處皆得十三資具時有苾芻至蘭若  
中見諸苾芻各自劬勞補破衣服告言諸具  
壽我所聞事與見不同林中苾芻問曰所言  
何義報曰我聞仁等七處皆得十三資具何  
意今時還縫破物諸苾芻報曰仁但耳聞我  
自肩負若尔何處得此破碎衣裳時諸苾芻  
具以緣報苾芻聞已極生嫌賤遂至任處白

諸苾芻諸苾芻以緣白佛佛告諸苾芻乃至  
問四十衆苾芻曰汝等實尔受他施物不知  
足耶實尔世尊

尔時世尊種種訶責不順正理心不調寂讚  
歎稱揚順理調善廣說乃至為諸苾芻於毗  
柰耶制其學處應如是說若復苾芻奪衣失  
衣燒衣吹衣漂衣從非親居士居士婦乞衣  
彼多施衣苾芻若須應受上下二衣若過受  
者泥薩祇波逸底迦言奪衣等文並如上應  
受上下二衣者有二種上下衣一苾芻上下  
衣二俗人上下衣苾芻上下者若是新衣兩  
重作僧伽胝豎三橫五若泥婆珊豎二橫五

俗人上下者上衣長十一肘闊三肘下衣者  
長七肘闊二肘應受者謂作心領受若過受  
者謂過前數乞得衣時便犯捨墮釋名捨悔  
廣如前說

此中犯相其事云何若苾芻從他乞俗人上  
下衣時依量而得若更乞時得惡作罪得便  
捨墮若乞苾芻上下衣時事亦同此若從他  
乞俗人上下衣時縱減俗量不應更乞若有  
長不却還主若從他乞苾芻上下衣時若少  
不充苾芻衣量應更從乞若有長應却還主  
若俗衣少更乞若苾芻衣有長不還得罪輕  
重准事應識若無心擬過乞者乞時得惡作

罪得物犯捨墮犯捨墮已更得餘物悉皆同  
犯廣說如前又無犯者最初犯人或癡狂心  
亂痛惱所纏

知俗人共許與衣就乞學處第八

佛在室羅伐城逝多林給孤獨園於此城中  
有一長者先有自妻復行邪行其妻告曰仁  
者不應作此邪行之事其妻屢諫夫不隨語  
婦起瞋嫌共餘男子亦爲私合其夫每以家  
物贈彼私婦其妻亦以家物遺彼邪夫夫婦  
兩人破散財物幾將略盡長者稟性暴惡打  
其婢使常與弊衣惡食告言由汝散我家資  
婢曰我實久知破散所以然而二俱家主不

敢斥言時彼夫婦知婢譏刺俱懷慚愧並默  
無言時鄔波難陀知是事已便往詣彼長者  
宅中為彼夫婦毀訾破戒讚歎持戒告言善  
男子善女人如佛所說邪行之人命終之後  
當墮地獄若得為人妻不貞謹夫有邪念若  
離邪行命終之後得生天上若生人趣妻室

貞良夫不邪念說伽他曰

由聽能知法

聞法離衆過

聞法捨惡友

聞法得涅槃

時彼夫婦既聞法已俱捨邪行時鄔波難陀  
復為夫婦廣述歸敬殊勝功德報言汝等二  
人更應善聽如佛所說

若歸佛陀者

不墮於惡趣

捨離於人身

當得生天上

若歸達摩者

不墮於惡趣

捨離於人身

當得生天上

若歸僧伽者

不墮於惡趣

捨離於人身

當得生天上

時彼二人聞法歡喜深生淨信即便歸依三

寶彼為讚歎五戒功德汝等善聽如佛說有

五種大施何謂為五若離殺生偷盜欲邪行

妄語飲酒是為五種大施何故離此五事名

為大施由離五故得無所畏無諸怨結妻室

貞良言則信受常不憍逸由此五故感無量

樂常處人天故名大施時彼二人聞此法已

倍生深信受五學處鄔波難陀令彼二人住



歸戒已捨之而去時彼長者復於他日更以  
苦楚而打其婢妻曰仁者我未識業果之時  
常行苦楚今由聖者鄔波難陁善知識故令  
我識業異熟不應更行苦楚然諸世人自受  
業報貴賤無恒誰是奴婢從今已往勿行杖  
木夫言賢首善哉此說命其婢曰小女汝可  
澡浴賜以新衣告曰應勤家業施汝無畏婢  
作是念此二家長先皆不仁好行楚罰苦虐  
於我弊衣惡食尚不充軀今者恩慈事同父  
母復更思念自從聖者鄔波難陁入此舍後  
仁心撫育更不打我我今欲將何物報聖者  
恩若於家中偷竊少物將報恩者家主若知

同前苦楚既無得處但懷媿心後於異時鄔  
波難陀來爲夫婦說法而去時長者婦告其  
夫曰仁豈不知聖者鄔波難陀是我等善友  
令捨惡業住善品中歸敬三尊受五學處復  
能時時以法相授我等宜應奉施多少長者  
問曰欲作何事妻曰施一白氎帔其婢聞之  
便作是念我以此言持報聖者時鄔波難陀  
旦入城中次第乞食至長者家婢見禮足告  
言聖者我有善言欲以相報問言何事婢曰  
我家長者及以夫人欲將上衣持奉大德鄔  
波難陀聞已生念世間所有貪饕之人我當  
一數今聞獲利實稱本心然此婢子雖有此

言我更窮詰便帶瞋色報言小女汝以何緣  
輒弄於我報言聖者豈敢相弄鄔波難陀報  
言小女若言實者家長設瞋我勸容恕若其  
虛者多與汝杖還同昔日報言聖者何事須  
疑但入宅中自當知矣時鄔波難陀即入其  
舍彼二夫妻見唱善來敷座令坐既禮足已  
便取界座跪而聽法爲說法已告言長者許  
與大氎我今欲見時彼夫妻互相瞻視鄔波  
難陀見而問曰何故仁等更互相看彼二荅  
曰聖者此是我等私屏之言誰當告知豈復  
聖者了他心耶鄔波難陀曰我從少來持鉢  
乞食齒落髮白於斯小事汝不信耶時彼長

者便授與衣。鄔波難陀受其衣已，周徧觀察，即便翻手，面帶憂相。長者問曰：「聖者，何意如此？」報言：「長者，汝有捨福無受用福，惟堪拂履，或用簾窻，置在筦竿，自然破壞。長者問曰：「欲何所為？」報曰：「更求好者。」施我作衣。荅言：「聖者，更無可得。」報言：「可買與我。」荅曰：「我無價直。」報曰：「且為賒買，後當還價。」是時長者復看妻面，妻曰：「聖者，鄔波難陀於我等處，誠有大恩，可為買衣，遂所希望。」時彼長者即將鄔波難陀往至市中，詣一鋪所。鄔波難陀便作是念：「我今鋪主發動高心，出上衣服報長者。」曰：「略觀此鋪，多是貧人，寧容得有上好白氈。」應向餘

處別可求之是時鋪主聞此語已便起高心  
出好上氎報言聖者何故相輕試看此氎  
波難陀曰實誠好物其價如何賣人報曰直  
五十迦利沙波拏波難陀曰三十當報賣  
人曰誰當還價報言長者相還問長者曰何  
時當與長者言某時當與賣人曰善隨意將  
去長者即便付與波難陀時波難陀報  
言長者無病長壽今所施物是心纓絡是心  
資助定慧莊嚴得人天道乃至廣說波難  
陀便持此氎往逝多林長者家貧不能依時  
還其氎價賣人遂立長者於赫日中不聽其  
去有知識見問言何意任立日中為有瘧病

爲服蘇耶報言我非瘡病亦不服蘇債久不  
還被立於此問言何時負債豈汝祖父負他  
債耶報言由我於釋迦子生敬信心以衣見  
施嫌惡不受令買好者置此艱辛時彼知友  
聞此事已便起譏嫌沙門釋子貪求無厭諸  
苾芻聞已具以其事往白世尊世尊以此因  
緣集苾芻衆廣說乃至佛告鄒波難陀曰汝  
實作如是不端嚴事隨他所施無知足心更  
換好物令彼辛苦白言實尔世尊如前種種  
訶責告諸苾芻我今爲諸弟子於毗柰耶制  
其學處應如是說

若復苾芻有非親居士居士婦共辦衣價當

買如是清淨衣與某甲苾芻及時應用此苾芻先不受請因他告知便詣彼家作如是語善哉仁者為我所辦衣價可買如是清淨衣及時與我為好故若得衣者泥薩祇波逸底迦若苾芻者謂鄔波難陀親非親等義如上說言衣價者謂金銀貝齒等辦者貯畜也如是衣者謂七種如上買者謂從他買言清淨者謂得如是堪受用衣與者謂施衣時某甲者謂鄔波難陀不受請者先未言許因他告知等者見他陳說往彼求衣強索其價為好故若得衣時便犯捨墮

此中犯相其事云何事有三種謂價色量云

何爲價若苾芻從非親人得五迦利沙波拏  
直衣受時無犯不受此衣更過索者索時犯  
惡作得時犯捨墮如是乃至五十迦利沙波  
拏等隨覓隨得輕重准上應知是謂爲價云  
何爲色苾芻得青色衣受時無犯不受此衣  
更過索者索時得惡作得時犯捨墮如青旣  
尔乃至餘色准此應知是謂爲色  
云何爲量若苾芻得五肘衣時受取無犯不  
受此衣更過索者同前得罪如是乃至多肘  
罪之輕重事並同前是謂爲量此泥薩祇衣  
捨衣方法事亦同前無犯者若乞縷纒便得  
小片若乞小片他與大衣此皆無犯又無犯



者謂初犯人或癡狂心亂痛惱所纏

知俗人別許與衣就乞學處第九

佛在逝多林時鄔波難陀苾芻起犯因緣長者及婦各與外人私通因爲說法捨惡修善事並同前但以二人各辦衣價爲異令彼二價共爲一衣致使長者受大辛苦苾芻以緣

白佛乃至爲制學處應如是說

若復苾芻有非親居士居士婦各爲苾芻辦衣價買如是清淨衣與某甲苾芻此苾芻先不受請因他告知便詣彼家作如是語善哉仁者可共買如是清淨衣及時與我爲好故若得衣者泥薩祇波逸底迦此中犯相三種

不同並如前說

過限索衣學處第十

佛在王舍城竹林園中時鄔波難陀作如是  
念我等所有經求之處皆由給孤獨長者啓  
請世尊制其學處我等假欲乞求狹小布巾  
尚無由得况寬大耶然我昔時共行雨婆羅  
門同一學堂從師受業我宜往見或容與我  
多少衣物便就彼宅門人止之聖者勿進報  
言賢首世尊制我五處不行唱令家姪女家  
酒家王家屠膾家此家豈是五處耶門人報  
曰聖者何須多作譏罵斯非唱令姪女等家  
然是婆羅門行雨之宅報守門人曰男子汝

宜入舍報婆羅門云大德鄔波難陀今在門外  
外須欲相見門人曰觀斯意氣似從勝光王  
斷事處來報曰癡人爲報者善若更遲延必  
當令汝招大杖罰門人自念看此形勢全無  
怖懼不同餘者必有所由當爲報知勿受其  
辱即便入報大德鄔波難陀今在門外云須  
相見婆羅門曰喚大德入誰復相遮門人聞  
已便作是念由此緣故豪望沙門全無怖意  
即便喚入婆羅門見遙唱善來敷座令坐既  
坐定已發美妙音讚歎施門殊勝功德若鄔  
波難陀發喜悅心讚布施者諸有信心婆羅  
門等聽法之時作如是念善哉妙法我等宜

應割肉持施時婆羅門聞法歡喜作如是語  
大德坐夏了日我當奉施六十金錢鄔波難  
陀曰賢首無病長壽即爲呪願念所施物是  
心纓絡乃至安隱涅槃即辭而去時有二苾  
芻從室羅伐至王舍城爲禮佛故詣竹林中  
是時世尊命具壽阿難陀曰汝今宜往告諸  
苾芻如來欲往憍薩羅國人間遊行若有情  
願隨從行者可料理衣服時阿難陀受教而  
去告諸苾芻宣世尊教時二新來苾芻聞是  
語已憂心而住鄔波難陀問曰汝二少年何  
意懷憂彼二荅曰具壽阿難陀告諸苾芻如  
來欲往憍薩羅國人間遊行若願去者當料

理衣服大德我適來至猶未解息如何更往  
室羅伐城時鄔波難陀聞已憂惱作如是念  
我經多時纔蒙少施寧知更有障礙事生至  
明日已即便往詣婆羅門家到已就座而坐  
作憂悒聲說施功德時婆羅門問言大德前  
來說法美妙音聲今者似帶憂色其聲卑下  
願聞其故鄔波難陀曰賢首我經多時纔得  
相見今時不久即欲別離作是語已懷憂而  
住世有言曰

摩揭陀人聞聲解

憍薩羅國覩形知

半字便了五王城

待言方解餘邊國

時行雨婆羅門聞鄔波難陀所說便作是念

此不爲我離別生憂但爲六十金錢而起愁  
惱報言大德隨仁何處作安居了我當奉送  
六十金錢鄔波難陀曰賢首無病長壽善哉  
施心始終堅固所爲福利當招勝果即辭而去  
尔時世尊大衆圍繞如餘廣說至憍薩羅往  
室羅伐任逝多林時有賈客從此城出將諸  
貨物詣王舍城然王舍城古昔常法若於他  
處有大賈旅至其國者王自看稅或今行雨  
大臣是時行雨看稅其物報賈客曰汝若還  
歸室羅伐者當報我知荅言尔賈人交易既  
了詣大臣所報言我欲歸國即便付與六十  
金錢告言此物汝可將與大德鄔波難陀彼

受物已作如是念若與行兩大臣先相識者  
彼定必是衆所知識大德苾芻我當於彼少  
爲利潤今彼生喜可買細氎將向彼城往竹  
林中問苾芻曰何者氎衣堪苾芻著苾芻報  
曰賢首汝今豈欲施僧衣耶報言我無暇施  
然行兩大臣附我六十金錢與大德鄔波難  
陁我今欲以金錢買氎將去望稱彼心諸苾  
芻曰汝今定當輸其白氎并索金錢賁人念  
曰今此苾芻或與彼讎隙即便更詣餘苾芻  
處具述前事苾芻報曰汝若不印金錢而將  
去者彼定索利賁人便念彼此語同事須防  
慮往大臣所令其印署大臣曰我今信汝豈

勞湏印賁人曰雖相委信賁人之法事湏詳  
審于時大臣便為印署賁人持往室羅伐城  
至逝多林問苾芻曰聖者鄔波難陀房在何  
處時諸苾芻示其住處彼往不見問苾芻曰  
大德鄔波難陀今向何處報言暫向寺外閑  
靜之處賁人報曰此之金錢是王舍大臣行  
雨所寄可為領取彼來當與苾芻報曰賢首  
汝頗曾見炬火發焰以頭觸之賁人即念此  
必與彼先有讎隙即詣餘苾芻處白言大德  
此之金錢是王舍大臣行雨所寄與鄔波難  
陀可為受取彼來當付諸苾芻曰若其不印  
而將來者彼必定當從汝索利誰能為彼輒



受此物汝自面付賣人念曰所言相似此定  
是難我在家中待彼苾芻自解應答報苾芻  
曰若鄔波難陀還至此者可爲報知我在某  
處必須物者可來取之言已捨去鄔波難陀  
後來寺內苾芻告曰大德鄔波難陀善哉世  
尊有如是說若具戒行意清淨者隨心所願  
皆得成就仁者今日息意林中即便獲得六  
十金錢遠來供養鄔波難陀告言具壽何處  
得有施主佛及大眾千二百五十各與六十  
金錢苾芻報曰惟仁獨得不徧衆僧鄔波難  
陀曰誰能惠我六十金錢報曰是王舍城行  
兩大臣寄來奉施報曰彼是我舊知識先已

有心與我此物誰爲受之好觀察不勿被措  
損及以破落是私鑄物不堪受用報言無人  
爲受鄔波難陀曰我比住在惡友之中誰肯  
爲受作是語時餘人報曰大德何事憂惱實  
人留語我住某處若須者可來取之  
時鄔波難陀聞是語已即取僧伽肱疾行而  
去往彼家中時彼賈人遙見急步即自念言  
看此形勢定是豪族沙門問言仁是鄔波難  
陀荅言是即便取錢報言此是大臣行雨所  
寄可領取之即爲廣作呪願賈人曰此非我  
財勿爲我呪願應可爲彼行雨大臣鄔波難  
陀曰損汝何事汝亦於我大有功勞遠從他

方持物來至借一小兒持錢將去到市店所  
即遣歸來聖者我無小兒報言癡人遠自王  
舍尚爲持來跬步之間不肯送去即命小兒  
令送錢去語小兒曰當隨後去不得餘行若  
其與汝餅果之直必不應取是時小兒持錢  
隨去至一店上報言聖者此處安錢鄔波難  
陀便作是念彼興生人教此童子不令隨我  
即報鋪主曰賢首此之金錢且爲收舉報言  
聖者我有家長鄔波難陀曰願汝常不自由  
復更向一賣香童子處告言賢首暫寄此錢  
報言我之尊人出外不在鄔波難陀曰願汝  
家長更勿重來復更詣一賣香童子創發信

心報曰賢首暫寄此錢報言我有大人不敢  
受寄鄔波難陀曰我言謂汝少有信心寧知  
更是信心羅刹若汝元無少許信者從苾芻  
足倒曳門外彼遂無語報言聖者可安此處  
鄔波難陀遂便歸寺時諸賣人先有制令若  
至日出不普集者罰金錢六十文母告童子  
曰汝當早去勿令他罰時鄔波難陀夜便生  
念起追悔心賣香童子初發信心或容於我  
諱所寄物既至天曉將一小兒往彼店所時  
彼店主閉門欲出鄔波難陀報言賢首還我  
金錢荅言聖者此處賣人先有制令若至日  
出方來集者罰金錢六十文少時且往赴集

方還鄔波難陀曰癡人我非汝僕使自取已  
錢誰能脚疼於此久立若不還我而便去者  
違勝光王教更當罰汝六十金錢彼聞是語  
即便瞋罵捉其錢裏擲之於地泥印便破鄔  
波難陀曰汝當且任我試解看不措缺不非  
私鑄不鋪王報曰仁豈檢看而付於我鄔波  
難陀曰雖我不看何故印破時彼鋪王銜恨  
而默旣至天曉集期便過時諸賈人來就家  
中將彼六十金錢物去其母報曰汝作何事  
違他衆制罰汝六十金錢子報母曰由與釋  
子共爲親友初發信芽即令推折便起嫌罵  
苾芻聞已具白世尊世尊以此因緣集苾芻

衆乃至廣說問鄔波難陀曰汝實作如是不  
端嚴事耶實尔大德佛以種種訶責乃至我  
今爲諸弟子於毗柰耶制其學處應如是說  
若復苾芻若王若大臣婆羅門居士等遣使  
爲苾芻送衣價彼使持衣價至苾芻所白言  
大德此物是某甲王大臣婆羅門居士等遣  
我送來大德哀愍爲受是苾芻語彼使言仁  
者此衣價我不應受若得順時清淨衣應受  
彼使白言大德有執事人不苾芻言有若僧  
淨人若鄔波索迦此是苾芻執事人彼使往  
執事人所與衣價已語言汝可以此衣價買  
順時清淨衣與某甲苾芻令其被服彼使善

教執事人已還至苾芻所白言大德所示執  
事人我已與衣價得清淨衣應受苾芻須衣  
應往執事人所若二若三令彼憶念告言我  
須衣若得者善若不得者乃至四五六返往  
彼默然隨處而住若四五六返得衣者善若  
不得衣過是求得衣者泥薩祇波逸底迦若  
竟不得衣是苾芻應隨彼送衣價處若自往  
若遣可信人往報言仁爲某甲苾芻送衣價  
彼苾芻竟不得衣仁應知勿令失此是時言  
苾芻者謂鄔波難陀王者若男若女或復餘  
人以王法灌頂者悉名爲王大呂者執王政  
事相依而立婆羅門者貴種多聞居士者謂

在家富贍等者諸餘雜類遣使者謂女男黃  
門送衣價者謂金銀錢等彼使持衣價等者  
謂持衣價到苾芻所白言大德者謂命前人  
此物是某甲等者謂述來處願爲納受是苾  
芻等者報不應受順時清淨者謂稱理而得  
彼使語苾芻等者謂問執事人苾芻言有者  
指其人若僧淨人者謂大衆淨人若鄔波索  
迦者謂歸依三寶受五學處彼使等者明使  
意也買者或買或織與某甲苾芻者指所與  
人言清淨者謂堪受用善教已者謂善教示  
具報苾芻若二若三等者出言往返數令彼  
憶念得者善者謂稱求心若不得者乃至四



五六返默然隨處而住者出默住數言隨處者有四處一敞處二舍處三田處四店處敞謂作瓦器等或荆駁處舍謂居宅田謂稻蔗等田店謂賣貨處有六詰問見彼六言隨事應詰云何爲六若彼問云仁今何緣得至苾芻荅云爲彼事來若云仁極善來此處應坐荅云爲彼事來若云食飯荅云爲彼事來若云噉餅荅云爲彼事來若云飲水荅云爲彼事來若於此六種隨一事中見他語時尋聲即報不徐緩荅令彼前人不暇作餘言者是則不名圓滿善好六種詰問若隨一事中見他語時尋聲未道徐徐緩荅令彼前人得有

容暇作餘語者是則名爲圓滿善好六種詰  
問若作如是求時得衣者善若不得衣過是  
求得衣者泥薩祇波逸底迦過者謂過三語  
六默而更往求得也若竟不得衣彼衣來處  
或自去或遣可信人去言可信者謂弟子門  
人是可委言報彼令知遣其收取勿使虛失  
此是還報法式

若苾芻遣使報已彼執事人來至苾芻所作  
如是語聖者可受此衣價苾芻應報彼曰此  
之衣價我已捨訖汝當還彼送衣來處如是  
報者善若取衣者犯捨墮

若執事人作如是語聖者仁可受此衣價彼

之施主我共平章令其心喜若如是者取衣  
無犯苾芻若不作如是次第受衣者皆犯捨  
墮既犯罪已捨悔之法廣說如前

此中犯相其事云何若人爲施主人爲使者  
人爲給事如法得衣者無犯異斯捨墮若人  
爲施主人爲使者非人爲給事如法得衣者  
無犯異斯惡作若人爲施主非人爲使者非  
人爲給事同前惡作若人爲施主非人爲使  
者人爲給事同前捨墮若非人爲施主非人  
爲使者非人爲給事同前惡作若非人爲施  
主非人爲使者人爲給事同前捨墮若非人  
爲施主人爲使者人爲給事同前捨墮若非

人爲施主人爲使者非人爲給事同前惡作  
若苾芻從非人乞衣價時得惡作罪得便捨  
墮從龍乞衣價時得惡作罪得便捨墮若苾  
芻遣使往或以書印乞時惡作得便捨墮又  
無犯者廣說如前

用野蠶絲作敷具學處第十一

攝頌曰

高世耶純黑

分六尼師壇

擔毛浣金銀

納質并買賣

佛在逝多林給孤獨園時諸苾芻作新野蚕  
絲卧具若自作若教人作此物難得復是貴  
價時諸苾芻爲營造故多諸事業妨廢正修

讀誦作意數數從彼婆羅門居士等乞野蚕  
絲諸外道輩見而嫌賤作如是語諸人當知  
此沙門釋子是殺生者不捨害業自作使人  
用新野蚕絲作卧具若用此者殺多有情如  
何以好衣食施彼秃人斷物命者時諸苾芻  
聞是語已往白世尊世尊以此因緣集苾芻  
眾問諸苾芻曰汝等實用新野蚕絲作卧具  
耶實尔世尊佛言汝等難滿難養不順少欲  
知足之行種種訶責讚歎杜多功德少欲知  
足乃至我今爲諸弟子於毗奈耶制其學處  
應如是說

若復苾芻用新高世耶絲綿作敷具者泥薩

祇波逸底迦若復苾芻者謂此法中人新有  
二種一者新作二者新得此中新者謂新作  
也高世耶作敷具者有其二種一者褚禡二  
者衿成此敷具言二種皆取作者作自作教  
人得捨墮罪捨悔等法廣說如前此中犯相  
其事云何苾芻料理高世耶時若於一繭若  
於小團若於大聚或披或擘或以弓彈而作  
敷具作時得惡作竟時得捨墮若苾芻乞高  
世耶時及料理時皆惡作成犯捨墮若得先  
已成或舊用物或是舊物更新撩理而受用  
者並皆無犯又無犯者謂初犯人或癡狂心  
亂痛惱所纏

根本說一切有部毗奈耶卷第二十

去

稍

音朝

攢集

官上在反

將師

類下所反

擒

音禽

苦虐

却下魚反

帔

反疋義

貪饕

鐵下音

桁竿

正上胡浪反

赫

反許客

讎隙

上音

逆

反酬下

跬步

上傾

創發

壯上昌反

諱

反許位 疼

反丘 芽

牙音 敞

正昌作

廠反 緩

反携伴

暇

夏音 蠶

俗昨咸反

楮

縻

下上音

音貯 紆

反古罕

繭

俗古與反

孽

反補

麦

